


Saga

„*Saga*“ getur einnig átt við kvenmannsnafnið Sögu eða tímaritið Sögu.

Saga getur átt við hverskyns frásögn hvort sem hún er í rituðu eða töluðu formi. Orðið merkir líka það sem gerst hefur í fortíðinni (stundum kallað *Saga* með stóru s-i eða *sagan* með ákveðnum greini) eða frásögn af einhverju sem gerst hefur í fortíðinni (stundum kallað *saga* með litlu s-i). Í þessum tveimur síðari merkingum er orðið yfirleitt eintöluorð en í fyrstu merkingunni getur það komið fyrir í fleirtölu.

Sagnfræði er síðan sú fræðigrein sem fæst við rannsóknir á sögunni í merkingunni atburðir fortíðar. Frásagnarfræði fæst við rannsóknir á frásögnum, gerð þeirra og byggingu, en margar aðrar fræðigreinar fást við sögur í einhverri mynd, til dæmis þjóðfræði, bókmenntafræði, textafræði, guðfræði og svo framvegis.



Fundur Rósettusteinsins markaði upphaf sagnfræðilegra og fornleifafræðilegra rannsókna í Egyptalandi á nýöld. Á steininum er texti á egypsku merkjamáli, sem áður var mönnum óskiljanlegt, en þar sem að á steininum var einnig grískur texti gátu menn lært merkjamálið og varð Rósettusteininn þannig lykillinn að ótal upplýsingum um Forn-Egyptaland.

Efnisyfirlit

Orðsifjar og útskýring á orðinu

Fræðileg sagnfræði

Tengt efni

Tilvísanir

Heimildir og ítarefni

Tenglar

Orðsifjar og útskýring á orðinu

Orðið **saga** kemur úr fornnorska orðinu *saga*, sem sjálf kemur úr frum-germanska orðinu **sago*. Orðið er samstofna fornenska orðinu *sagu* (en þaðan kom enska orðið *saw* sem merkir „málsháttur“), fornháþýska orðið „*saga*“ (þaðan kom þýska orðið „*Sage*“), fordanska „*saghæ*“, fornsænska „*sagha*“, færeyska „*søga*“, nýnorska „*soge*“, Jóska „*save*“ (sem þýðir „*sögn*“ eða „*frásögn*“), sænsk mállyska „*sagu*“. Mögulega skylt litháíska orðinu „*pasanka*“.

Orðið *saga* er í íslensku notað um ýmislegt annað en frásögn, svo sem **lögsögu**, en þá er átt við umráðarétt einhvers í daglegu máli. *Saga* er skylt orðinu að *segja*, sem dæmi má nefna íslenska orðið *fiskisaga* (samanber orðatiltækið „Fljótt flýgur fiskisagan“) sem merkir að sagt er frá fiskigöngu, hvar fisk sé að finna. Þá er hugtakið *lygasaga* sömuleiðis notað sem gefur til kynna að sögur hafi verið álitnar annaðhvort sannar eða ósannar.^[1] Áður var talað um lögsögu sem „upplestur laga“ við Alþingi (sjá lögsögumaður) og umráðaréttur hans lögsaga. Orðið *saga* í þessu tilfelli á beinlínis við hverskyns orðræðu algjörlega óháða innihaldinu. Í daglegu máli, þegar orðið stendur eitt og sér, er þó oftast átt við bókmenntalega eða fræðilega sögu (frásögn).

Gríska orðið *historia* (könnun og frásögn af henni), latneska orðið *res gestae* („hlutir sem hafa gerst“) og þýska orðið *Geschichte* (af sögninni *geschehen*: gerast, sbr. dönsku sögnina *sche*) ná báðum þessum meiningum.^[1]

Fræðileg sagnfræði

Aðalgrein: Sagnfræði

Sagnfræði er fræðigrein sem fæst við rannsóknir á samfélögum manna og þróun þeirra í tímans rás. Lagt er hlutlægt mat á sögulegar heimildir (ritheimildir, fornleifar o.s.frv.) og setur atburði í samhengi við tíma svo hægt sé að skoða framvindu sögunar og staðsetja atburði í tíma og rúmi. Sagnfræði afmarkar gjarnan viðfangsefni sitt eftir menningarsamfélögum, tímabilum og staðsetningu. Saga mannkyns fjallar til að mynda um upphaf siðmenningar og þróun allt til okkar daga. Saga 19. aldar er saga atburða og lýsing á samfélögum heimsins á þeim tíma, þ.e. hundrað ára tímabili eftir gregorísku tímatali. Jarðsaga er undirgrein jarðfræðinnar og greinir frá þróun jarðarinnar.



En hvatki er missagt er í fræðum þessum, þá er skylt að hafa það heldur er sannara reynist.



— Ari fróði

Í sagnaritun setur sagnfræðingur fram niðurstöðu rannsókna sinna í samfelldri frásögn. Þá reynir hann að endurskapa sögulegt samhengi þeirra heimilda sem hann hefur rannsakað og setur fram tilgátu um tiltekna sögulega framvindu.

Fyrir upplýsinguna voru mörkin milli þess hvað talið var raunverulegt og óverulegt töluvert óskýr. Eftir því sem maðurinn taldi sig færan um að geta greint þar á milli varð til skáldsagan. Allt annað var bundið ófrávíkjanlegum lögmálum um hvað gæti gerst og hvað ekki, hvað hefði gerst og hvað ekki.^[1]

Tengt efni

- Annálahreyfingin
- Einsaga
- Forsaga
- Heildarsaga
- Klassísk söguhyggja
- Marxísk sagnfræði
- Nýsöguhyggja

Tilvísanir

1. Gunnar Karlsson. „Hvað er saga?“. Vísindavefurinn 22.4.2002. <http://visindavefur.is/?id=2326>. (Skoðað 23.10.2011).

Heimildir og ítarefni

- Evans, Richard J. *In Defence of History* (New York: W.W. Norton, 2000).
- Gunnar Karlsson. „Hvað er saga?“. Vísindavefurinn 22.4.2002. <http://visindavefur.is/?id=2326>. (Skoðað 23.10.2011).

- Tosh, John. *The Pursuit of History* 5. útg. (Longman, 2010)

Tenglar

- Vísindavefurinn: „Hvað er saga? (<http://visindavefur.hi.is/svar.asp?id=2326>)“
- Vísindavefurinn: „Hvaða hlutverki gegnir saga og sagnfræði? (<http://visindavefur.hi.is/svar.asp?id=2329>)“
- Veraldarsagan í tölum; grein í Lesbók Morgunblaðsins 1954 (<http://timarit.is/titlebrowse.jsp?issuID=418356&pageSelected=9&lang=0>)



Þessi sögugrein er stubbur. Þú getur hjálpað til með því að bæta við greinina (<https://is.wikipedia.org/w/index.php?title=Saga&veaction=edit>).

Sótt frá „<https://is.wikipedia.org/w/index.php?title=Saga&oldid=1568625>“

Þessi síðu var síðast breytt 16. október 2017, klukkan 15:21.

Textinn er gefinn út samkvæmt Creative Commons Tilvísun-DeilaEins leyfi. Sjá nánar í notkunarskilmálum.